



KOMUNIKADO PA PRENSA

Fecha
30 di novèmber 2015

Kontakto
Kabinèt Minister VVRP

RIBA INISIATIVA DI MINISTER CAMELIA-RÖMER: **SERVISIO PA OBRA PUBLIKO A EVALUA I TIN TUR SITUASHON BOU DI KONTROL**

Willemstad – Servisio pa Obra Públiko (OW), riba inisiativa di Minister Suzy Camelia-Römer a hasi un evaluashon total di e situashonnan ku a surgi riba nos kareteranan despues di e kantidat imenso di awa ku a kai djasabra último, 28 di novèmber.

Durante di e evaluashon a konstatá ku e area ku mas a keda afektá tabata e area di Banda'bou pa ta mas esakto Tera Kòrá, Kaminda pa Willibrodus i e proyekto privá di Coral Estate.

Segun sifranan di Servisio Meteorológiko, e kantidat nòrmal di awa ku ta kai pa dia ta entre 10 i 15mm. Den e besindarionan ariba menshoná e nivel di awa tabata kasi 170 mm, pues 150mm mas ku a kunstumbrá. A konsekuensha, e proyekto ku a kaba di finalisá na Tera Kòrá, mesora a haña su mes ku e reto pa prosesa hopi mas awa ku nòrmal sa ta usual. Pa ta mas spesífiko, sifranan di e último 20 añanan ta mustra ku na Tera Kòrá den luna di novèmber, un promedio di 128mm di awa ta kai durante un (1) luna kompleto.

Djasabra último, kasi 170mm di awa a kai den sinku (5) ora. Despues di a konstatá esaki durante evaluashon, awe mainta 30 di novèmber OW, den konsulta ku Minister Camelia-Römer a tuma e desishon pa bin ku mas alternativa pa por prosesá mas awa den ménos tempu. No ta trata aki di habri e kaya bèk, pero mas bien di trese mas método pa asina grandi di awa por bai mas lihé for di riba kaya.

E kaminda pa Willibrodus tambe tin tres (3) area ku a keda afektá. Un dje areanan afektá ta na altura di “Landhuis Hermanus”, kaminda lodo a subi e karetera. E otro areanan, ta e kaminda ku ta bai Tera Kòrá via di Jan Kok kual tambe a keda afektá pa lodo. Mañan mes OW ta bai laga drecha e kamindanan ya asina pueblo por hasi uzo optimal di e kareteranan bèk. E area ku a keda ku mas daño ta e ruta pa bai laman Daaibooi. Esaki ta rekerí un rekonstrukshon di e karetera riba termino kòrtiku, loke OW a kuminsá plania kaba.

E proyekto privá di Coral Estate a sufri hopi daño tambe i e reparashon ta un responsabilidad di organisashon privá ku ta doño di e proyekto. Den e kaso aki e Ministerio di Tráfiko, Transporte i Planifikashon Urbano (VVRP) no ta hunga ningun ròl. Nos opstante di esaki, VVRP ta mas ku dispuesto pa pone nan ekspertisio na disponibilidad di Coral Estate pa evitá futuro inkumbinensia.

Minister Camelia-Römer apesar di ta na Fransia pa representá Kòrsou den un konferensha di klima, ke informá pueblo di Kòrsou ku VVRP tin tur situashon bou di kòntrol.



KOMUNIKADO PA PRENSA

Fecha

30 di novèmber 2015

Kontakto

Kabinèt Minister VVRP

Pa mas informashon di tur e desaroyonan rondó di Minister Camelia-Römer su akshonnan por bishitá e pagina di facebook “Minister Suzy Camelia-Romer” i pa desaroyo di e proyektonan di infrastruktura, por bishitá www.oloshiii.com